

近代中國史料叢刊第四十輯
沈雲龍主編

荻芬書屋文詩稿

董恂著

文海出版社印行

荻芬書屋
文豪



Wt 207/118

荻芬書屋文稿

甘泉董恂醴卿甫著

總目

策問

序

議

論

辯

記

說

跋

書後

祭文

啟

箴

銘

教

贊

連珠

雜說

總目

男蓮校刊

荻芬書屋文稿

同治戊辰科會試策問

問自書契作而經籍於以權輿三墳言大道五典言常道所紀何代有可徵信否八索九邱其名義若何易爲羲文姬孔之精後來有子夏易有丁寬易有孟喜易作易傳者自漢以來計若干家能詳述其源流鑒別其真僞否虞夏商周之書古文今文其同異安在堯典多紀唐事何以列於虞書禹貢成於舜時何以列於夏書能言其故否尼山庭訓詩禮爲宗說詩者代有其人魯詩齊詩而外有韓詩有毛詩數者孰優大戴禮小戴禮篇目何若有與大戴

小戴並列者爲誰能實指其人否大學中庸本載禮記何以別爲章句能推闡其義否春秋一書立萬世臣子大防而左氏公羊穀梁三傳往往互有得失論者優劣之亦未必盡得其平能一一指陳否

聖朝稽古右文經訓大備儒者通經所以致用其悉據所素蓄以對

問春秋編年本魯史也自刪定後已列爲經矣二十一史當以何者爲稱首司馬遷著史記易編年而紀傳歷代以來孰沿其例孰變其例能詳言之否班固薄司馬遷而漢書實憲章遷能指其端

否論班書者或詆爲專事剽竊或稱其音節超詣如英莖咸韶所見孰是范氏撰後漢書自謂體大思精論者稱其類次整齊用律精深然歟否歟三國志敘事高簡有法顧或譏其大綱顛倒其可議者安在晉宋齊梁陳隋諸書撰者何人後魏書北齊書周書孰優南北史新舊唐書新舊五代史得失奚若宋遼金元以上諸史有可頡頏馬班者否資治通鑑編年之法祖述春秋議者惜其義例有未精能條舉其事否通鑑綱目視資治通鑑何如多士探討舊聞將以備

朝廷著作之選凡所講明切究其悉陳之

問以人立政道在興賢周官大司徒以鄉三物教萬民而賓興之鄉大夫三年大比考其德行道藝而興賢者能者下至州長黨正族師閭胥莫不各有造就人才之責其節目能詳言之否漢制以賢良方正得人爲最其舉於郡國察於二千石猶是鄉舉里選遺法魏晉九品官人古意寢失論其弊者曰三難曰八損能臚舉否隋制諸州歲貢三人工商不得入仕其道何如秀才字始見何書舉人定名昉自何時明經進士何科最盛唐宋以來制科宜遵何代何以息奔競何以免冒濫何以舉士不必襲三代之名而士無往非三代之行能一一推陳否方今

聖天子雅化作人官方澄敘吏治儒風蒸蒸日上學者講求有素其各以所得著於篇

問官廩兵糈皆於漕乎是賴河運海運二策孰優轉運變而爲兌運兌運變而爲長運能詳其沿革否江北運程自南而北瓜儀運河來源何所取資高寶運河淮安運河歷代經理何若中河阜河泇河新河能悉數其源流否五大水櫃今昔情形若何濟水伏流出而爲泉者以百數其有神於運道者能分別其支派否會通一河於漕艘良便南旺分流柳林牖十里牖操縱由人運河命脈全在於此其建策者爲誰堤城有垣戴邨有垣其制何如汶洸泗沂

而外由臨清而北惟衛水爲大或議引漳入衛或議引沁入衛孰得孰失天津爲衆水匯歸之區能一一舉其名否由津抵通所藉資者何水通惠河勢由西而東若建瓴五牖節水規制誠善然不免於遞相轉輸海運之米抵通以後亦必由此遞倉能設策以免狼戾否

天庾正供所關至鉅多士留心時務其實言毋隱

問辟以止辟刑期無刑明刑所以弼教也有虞何以合兵刑爲一官成周何以分兵刑爲二職秋官自大司寇至司隸有所謂三典三刺五刑五聲五禁五戒五隸八辟八成者其詳言之漢高祖入

關約法三章唐高祖入關約法十二條其目若何宋元豐中分勅令格式爲四其說安在舜典金作贖刑或以爲非聖人法漢文帝詔除肉刑或以爲令民輕犯法何歟易言赦過宥罪書言眚災肆赦周官言司刺掌三宥三赦不忍人之政也諸葛亮不輕議赦其故安在夫刑以教中故曰斷中曰受中曰登中皆權其輕重以取中也今欲毋枉毋縱一秉大中操何衡而可我國家慎憲省成勤恤民隱固將以協咸中之慶而推法外之仁也其斟酌古今之宜揚推陳之

光緒丙子

恩科會試策問

問經訓爲常而詁經不能無異經不以文重而後世之文實祖之
易之十翼書之七觀詩之六義春秋之四繫五始禮之三支四名
此其最著者矣能詳之否六宗九江其說凡幾輪平淪平其義孰
優莫陸綠竹定爲幾物伐檀有鶉四月亦有鶉駟有駢閼宮亦有
駢七月有茶出其東門亦有茶將仲子有杞四月亦有杞其異同
若何檀弓筆力視左國何若古無騎戰曲禮言前有車騎或謂其
書當出周末然否後世不敢擬經亦何敢不尊經試觀論說辭序
孰統其首詔策章奏孰發其源賦頌誦讚孰立其本紀傳移檄孰
爲其根銘誄箴祝孰總其端能歷溯之否

聖朝經學昌明多士講求有素其詳述所聞毋隱

問古今事要史傳之史之傳讀史者又各以所聞見札記而羽翼之史記有集解有索隱有正義或別行或散附今本史記中能舉作者姓氏否班氏漢書多因史記之舊而時竄改其篇章字句爰有班馬異同一書撰者何人范氏後漢書中志與年表補之者誰復有兩漢刊誤補遺一書撰者何人陳壽三國志尊魏抑蜀宋蕭常作書正之元郝經復作書正之其書何名晉書傳論有出唐太宗御撰者何篇李延壽南史綜宋齊梁陳之事北史綜魏齊周隋之事其後作南北史合注者何人新唐書有糾謬新五代史本名

五代史記有五代史記纂誤其書撰自何人各若干卷史記之缺孰補之漢書之成孰續之後漢書三國志孰注之

國家右文稽古網羅放佚續學之士將以備三長之選其摭所素懷以對

問歷代官制不同名稱亦異唐之同平章事宋之參知政事當漢之何官秦之典客漢之鴻臚當周之何官晉以後之侍中視秦漢之侍中何若唐以後之僕射視秦漢之僕射何若唐平章之與參政宋平章之與參知其位次何若唐之御史大夫與漢之御史大夫異唐宋之門下侍郎與漢之侍郎異能詳其制否兩漢之民曹